

No. 1365 [No. 1366]

八名普密陀罗尼经

大唐三藏法师玄奘奉 诏译

如是我闻。一时薄伽梵。在室罗筏住誓多林给孤独园。与大苾刍众千二百五十人俱。及无量无数菩萨摩訶萨。并诸天人阿素洛等。异类大众前后围遶。

尔时世尊告金刚手菩萨言。善男子汝所受持诸上明。呪神用威猛功业难成。虽后为益或初暂损。今有八名普密神呪。威德广大事业易成。神用秘密始终无损。能受持者必获利乐。当为汝说汝乐闻不。时金刚手欢喜踊跃。顶礼佛足右跪合掌。请言世尊唯愿为说。

佛言谛听极善思惟。吾今为汝分别演说。何谓八名普密神呪。一名功德宝藏。二名庄严象耳。三名善勇猛。四名胜谛云。五名成炽然。六名微妙色。七名严饰。八名金刚。若有得闻此八名呪。于当来世经七俱胝那庾多百千大劫。不堕地狱傍生饿鬼。将命终时身心安隐。见有诸佛及诸菩萨来现其前。为说大乘甚深法要。既闻法已。必得往生覩史多天奉事弥勒。后随弥勒下瞻部洲。行愿渐增乃至究竟。陀罗尼曰。

頌[齿*来](擿界反已下同)筏[齿*来]捺[齿*来]竭刺[齿*来]苏谜苏摩苏契萨缚迦摩娑达泥呬梨寐梨薜薜梨悉殿都谜萨缚迦摩娑驮室遮幔怛罗般陀莎呵

佛说如是普密呪时。八千俱胝诸恶神鬼。皆生欢喜舍离毒心。归佛法僧断恶修善。俱诣佛所发诚谛言。愿常护持此大神呪。令受持者身心安乐。佛言善哉如汝所愿若有善男子善女人。归佛法僧及金刚手。能处闲静坚修梵行。亲近制多受持读诵。所求善愿无不皆得。乃至无上正等菩提。恒忆宿命无有忘失。

时薄伽梵说是经已。金刚手等一切菩萨。及诸天阿素洛等。一切众会闻佛所说。皆大欢喜。信受奉行。

八名普密陀罗尼经

【经文信息】大正藏第 21 册 No. 1365 八名普密陀罗尼经

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
